

Inyarubha ya Paauru kwa Abhafiripi Ubhukangati

Inyarubha yinu yo omohocha wa Mungu Paauru, akaandikira risengerero rinu riri karubhiri rwa Firipi. Irarorekana Paauru akaandika inyarubha yinu hanu aari mokebhoho karubhiri rwa Ruumi. Paauru akabhaandikira Abhakiriisitu bhanu bhiisiriiryi Yisu Kiriisitu hanu aahikiri kubharwazira Ing'ana Inzumu. Gayo kuhita, Abhakiriisitu bhayo nebho bhirikiin'yi ubhusiigi kwa Paauru na kumusakirya kubhwindi bhwazi.

Chu ukugirya Paauru abhaandikiri inyarubha yinu, yaari ni-kubhakumya Abhafiripi kubhusakirya bhunu bhaahurukiryi kwawe kuhitira kwa ipafuraditu. Na akeenda kobheerekeererya amang'ana go okokora na kubhaha amanaga korereke bhabhi bharatuna Yisu Kiriisitu kwa bhwigumirirya. Ring'ana irindi rinu aari areenda kubhabhaurira, ryari kubharecha bhatiisirirya amiija amabhi ga Abhayaahudi, ganu gaabhakuriri kutaaman'ya na abhiisirirya mwisengerero ryabhu.

Inyarubha yinu iramenyekana inyarubha yo obhozomerwa, ku kubha muni yaku amiisiigi go obhozomerwa gariigarukira manga kaaru. Obhozomerwa bhuyo bhuri kubhiisirirya bha Yisu Kiriisitu.

Amakeeren'ya

¹ Inyarubha yinũ nandikiri inyĩ Paauru, hamwimwi na Timoseo, omohocha umukindichani wa Yĩsu Kiriisitu. Turabhaandikira abhaangariri na abhasakirya bha risengerero, na niimwi abharĩdu* abhandi bha Mungu bha Firipi bhanũ mugwataniibhwĩ na Yĩsu Kiriisitu.

² Ibhigangi no omorembe kurwa kwa Bhaabha Mungu, na kuMakuru Yĩsu Kiriisitu, bhĩbhi na niimwi.

Paauru arasabhira Abhafiripi

³ Ribhaga ryasi hanũ nikubhahiita, nirakumya Mungu, Umakuru waani.

⁴ Ribhaga ryasi hanũ nikubhasabhira, nirasabha kobhozomerwa,

⁵ ku kubha imwi mugwatĩni na niinyi karagan'ya Ing'ana Inzumu, kwima urusiku ranũ mwigwiri na kwisirirya kuhika reero.

⁶ Nina amaheene kubha Mungu wanũ aatangiri emeremo imizumu mozekoro zaanyu, aragikaja kuhika ginagi urusiku ranũ Yĩsu Kiriisitu akugaruka.

⁷ Ni-bhwaheene niseegebhu iguru waanyu imwasi, ku kubha nibhasigiri bhukung'u. Maragwatana kubhigangi bhya Mungu hamwimwi na niinyi, arĩbhi nibhahirwi mokebhoho hamwi arĩbhi niriibhagira na komenyeekererya Ing'ana Inzumu.

⁸ Mungu aminyiri niragamba amaheene hanũ nikukandikija kubha, niriigomba bhukung'u kumumana na niimwi kwiki. Nibhasigiri imwi

* **1:1 Abharĩdu.** Kumaragirira bhukung'u, rora Ikinibhasa.

kubhushigi bhuryabhurya, bhanu Yisu Kiriisitu anabhwiri.

⁹ Nirabhasabhira kwa Mungu, ubhushigi bhwanyu bhukaji kwaruha bhukung'u, na mubhi na amang'ini nu ubhwabhuri,

¹⁰ korereke mobhone kwobhoora ge enzobhooro. Hayo neho muriibhi bhagururuku na mataana isoro, kuhika urusiku ranu Kiriisitu akugaruka.

¹¹ Chimbu amati guhiibhura imisumu, na niimwi nimbu mubhakorere abhakindichanyu amang'ana amazumu chimbu Yisu Kiriisitu, iguru wu ubhugungu nu ubhukumya bhwa Mungu.

Ubhwikari ne-komohokerya Kiriisitu

¹² Mmbe, abhahiiri bhaani, nereenda momenye bhwaheene kubha guusi ganu gambwini, gasakiriyi bhukung'u kuraarika ing'ana inzumu.

¹³ Abhariibhi bhushi bhi inyumba ya ubhutimi, hamwimwi na abhandi bhushi, bhaminyiri nibhahirwi ku kubha nirahokerya Kiriisitu. ¹⁴ Hamwimwi na gayo, niminyiri okobhohwa kwani inu, kubhakuriri abhiisirirya abhakindichitu bhaaru bhanagi imyuyu ku Mukuru Yisu, ku kunaga kuyo bhakarwazira abhaatu ing'ana ya Mungu kumanaga guusi, bhataana bhwubha.

¹⁵ Ni-maheene bhareho abhandi bhanu bhakurwaza ing'ana ya Kiriisitu ku kubha bharandorera rihari na bharahizana na niinyi. Naurubhu, bhareho abhandi bhanu bhakurwaza kubhwindi ubhuzumu.

16 Bhanu bharakorabhu kubhusigi, inu bhiizi bhwaheene kubha nitirwi mokebhoho korereke nibhagiri Ing'ana Inzamu.

17 Nawe abhandi, bhararwaza ing'ana ya Kiriisitu kwi ikinyawitu, na itari kwa mwuyu mwiru. Bhareenda kwongera inyaaku yaani mokebhoho.

18 Nawe iranyahaaraki? Ing'ana ya Kiriisitu irarwazibhwa, ibhi kubhwindi ubhubhi hamwi kubhwindi ubhuzamu. Na niinyi ku kubha ya ring'ana riyu nirazomerwa. Na nirakaja kubha no obhozomerwa.

19 Niminyiri kubha mwagusi ganu gambwini, nirasabhurwa, ku kubha mansabhiiri kwa Mungu, ne Ekoru Indindu† ya Yisu Kiriisitu iransankirya.

20 Niriisega kobhoono kuru na kwisega nitakusuka kanzira yuyusi. Nangu chimbu yaari zisiku zusi, nirakaja kwikong'ererya mumwuyu kwa bhakararu, korereke Kiriisitu akumibhwi kwa gusi ganu nekokora, ibhi kusaaga muhu ru hamwi kukwa.

21 Nirasaagi muhu ru, ubhuhu ru bhwani bharabha bhwo okomomenya, kumusiiga, komohokerya na kumukurya Kiriisitu. Na niraakwi, kukwa kwani ni-bhwera bhukung'u.

22 Nawe niraakaji kwikara kusi, nirakaja korora imisumu je emeremo ginu nekokora. Nangu nerobhore ryahe? Inyi nitizi!

23 Nirarutwa gati wa amang'ana abhiri. Nereenda kurwa kusi hanu, niikari hamwimwi na Kiriisitu. Rina neryo nekorora rizumu kwa niinyi.

† 1:19 **Ekoru Indindu.** Kumaragirira bhukung'u, rora ikiniibhasa.

24 Nawe, ni-bhwaheene bhukung'u inyi neng'ehe kwikara kuusi iguru waanyu.

25 Nene eheene ya ring'ana riyo, nizi narakaja kwikara kuusi. Na nrabha hamwimwi na nimwi imwusi, korereke nibhasakiryi mukari mubhwisirirya bhwanyu na kubha no obhozomerwa.

26 Hanu nikubha hamwimwi na niimwi, marazomerwa bhukung'u ku ukugwatana na Yisu Kiriisitu, ku kubha arabha ansakiiryi nigaraki kwa niimwi.

27 Mmbe, eteemwa yanyu iring'aani ni Ing'ana Inzumu iguru wa Kiriisitu. Korereke hanu nikuuza kubharora hamwi niraatami kuuza, niigwi muriimwirira bhwima kubhwigwani, kwa mwuyi gumwi na kubha mari hamwimwi maranyaakira ubhwisirirya bhenu bhukurwa kwi Ing'ana Inzumu.

28 Mutubhaha abhabhisa bhaanyu kwing'ana ryaryasi. Yiyo irabherekeererya ebho bhararichwa, nawe imwi marasabhurwa. Gayo guusi ne-meremo ja Mungu.

29 Mutahirwi kumwisirirya Kiriisitu ukwene, nawe mahirwi nu ukunyaakibhwa iguru waazi.

30 Muriitana na ganu naari kwitana naga, chimbu mwaruzi. Na nangwinu muriigwa kubha narakaja kwitana naga.

2

Ukwiga ubhusuuku bhwa Yisu Kiriisitu

1 Marahaanwa umwuyi kuring'aana nu ukubha abhaatu bha Kiriisitu? Marahanibhwa nu ubhusigi bhwazi? Munu ubhugwatani ne Egoro

Indindu? Musiigirwi na kororerwa ibhigungi na Kiriisitu?

² Ariibhi nimbu iri, mumari obhozomerwa bh-wani ku kubha nu ubhwigwani nu ubhusigi imub-heene kobheene. Naatu, mubhi nu ubhwigwani mummyu janyu na mubhi nu ubhwindi bhamwi.

³ Mutakora ing'ana ryaryasi kwi ikinyawitu nuru kubhwiuyungi. Nawe mubhi nu ubhanyuuhu na kubhara abhandi bhanagu bhukung'u kukira imwi.

⁴ Umutu atiiseega amang'ana gaazi ageenebhu, nawe iseege na amang'ana ga abhandi bhusi.

⁵ Mubhi nu ubhwindi bhuryabhurya, bhanu aari nabhwi Yisu Kiriisitu.

⁶ Nangabha ewe simuka aari Mungu, nawe ataruzi kubha ncha Mungu ni ing'ana rya kugwatirira.

⁷ Ewe akaritiga riyo, akiyicha, akabha ncha mbusa, akiibhurwa mumubhiri gu umwana wa amasaahi,

⁸ Neewe aari nu umubhiri gu umwana wa amasaahi

akiyicha, akabha musuuku kwa Mungu, akiisirirya kukwa,

nuru kukwa kumasarabha!

⁹ Kwibhu Mungu akamugunga bhukung'u, akamoha iriina ikuru kukira amariina gusi,

¹⁰ korereke kubhusuuku bhwi iriina rya Yisu,

ibhityinyi bhyasi bhihigami kwewe,

bhya mwisaaru,

bhya kusi

na bhya nyaari,*

* **2:10 Nyaari.** Kumaragirira bhukung'u, rora ikiniibhasa.

11 korereke abhaatu bhushi bhiisiriryi
Yisu Kiriisitu ni-Mukuru,
ku ubhugungu bhwa Bhaabha Mungu.

Abhiisirirya bhabhi nchi imiringiri kushi

12 Mmbe, abhasigwa bhaani, hanu naari kwa
niimwi, mwari murasuka Mungu siku zushi.
Ibhuibhu, nuru ribhaga rinu nere kore na niimwi,
makaji kokora ganu gakwenderwa kubhaatu
bhanu Mungu abhasabhwiri. Mokore gayo kwa
kurigita na kwubhaha Mungu.

13 Mmbe, mokorebhu ku kubha Mungu newe
akokora emeremo kwa niimwi, korereke mushigi
na kokora amang'ana ganu asigiri gakorwe.

14 Amang'ana gushi ganu mokokora, mutakora
kwa kwibheerya na kuhakaana,

15 korereke mabhi bhaana bha Mungu
bhaguruku bhanu bhataana isoro. Mabhi
abhaana bhanu bhatakugambwa kibhi, gatigati
wa abhaatu bha nangwinu bhanu bhiizwiri
amabhi na bhahabhiri. Gati wa abhaatu
bhayo, imwi mororekani nchu ubhwiru bhanu
bhukubhanza kushi.

16 Muriigwati bhwaheene ring'ana ryu
ubhuhuru. Mokorebhu hayo neho na niinyi
niizunjiryi urusiku rana Kiriisitu akugaruka,
kubha emeremo ginu nang'ihiri kohocha gati
waanyu gitaari ja bhaha.

17 Ariibhi nuru ubhuhuru bhwani
bharahurukibhwa nchi ikimweso chu ukunywa,
hamwimwi nu ubhwisirirya bhwanyu bhanu
mokokora ikimweso mubhutangi bhwa Mungu,
inyi nirazomerwa. Na nirazomerwa hamwimwi
na niimwi imwasi.

18 Na niimwi mozomerwe ibhuibhu, na musambaaruki hamwimwi na niinyi.

Paauru aratuma Timoseo na Ipafuruditu

19 Umukuru Yisu arisigi, niriisega kutuma Timoseo haguibhu, aazi kwa niimwi, korereke ariigaruki, nihunibhwi hanu akambuurira amang'ana gaanyu.

20 Nitaana umutu uwundi wanu ari haguhi bhukung'u na niimwi ncha Timoseo.

21 Abhandi bhusi bhari haguhi na amang'ana gaabhubhu, bhataru haguhi kokora amang'ana ga Yisu Kiriisitu.

22 Nawe mwizi chimbu Timoseo iyirikiryi kubha mututu muzumu. Ahukiryi na niinyi momeremo ju ukwerekeererya Ing'ana Inzumu, nchu umwana na wiisi.

23 Mmbe niriisega niramutuma kwa niimwi bh-wangu hanu nekomenya chimbu amang'ana gaani gakukaja.

24 Naatu niriisega Umukuru Yisu aranyi-isiririrya niizi kwa niimwi haguibhu.

25 Nangu nirarora bhwaheene kumutuma kwa niimwi umwisirirya umakindichani Ipafuruditu, wanu akohocha emeremo ja Mungu hamwimwi na niinyi. Ewe ni-musirikari mukindichani. Na newe mwatumiri iwaani kansakirya na kanyangarira mobhegero bhinu nikusuuhirwa.

26 Niramwisiririrya ku kubha ewe ariigomba kurumana na niimwi imwasi, umwuyu gwazi gurumikiri ku kubha mwigwiri aari murwiri.

27 Heene aari murwiri, aari arikiriiri. Nawe Mungu akamororera ibhigungi, akamohorya. Itari Mungu aari ni ibhigungi kwewe umwene, nawe

aari ni ibhigangi nauru kwa niinyi, korereke nitarumika kwiki.

²⁸ Kugayo, nikuriri umucha kamutuma aazi kwa niimwi, korereke hanu mokomorora kwiki mozomerwe nu umwuyu gwani gohoreere.

²⁹ Mmbe mumsung'aani kwa bhozomerwa bhwasu kubhasiigi bhwa Umukuru. Moreenderwa kubhasuka abhaatu bhanu bhaangi ewe,

³⁰ ku kubha hasuuhu akwi iguru we emeremo ja Kiriisitu. Aari isiriiryi kutura ubhwikari bh-wazi, korereke ahichi ubhasakirya bhanu imwi mwatamirwi kubhuhicha kwa niinyi, ku kubha naari kore na niimwi.

3

Pauru ariisega Kiriisitu

¹ Akumara, abhahiiri bhaani mozomerwe, ku kugwatana na Umukuru Yisu. Nitakuniha kugarukira amang'ana ganu na aabhaandikiiri, ku kubha gayo ni-ngubha yanyu yu ubhwisirirya.

² Mwiyangariri na abhiija bhu uririmi bhanu bhakusikirya imigiru ji ikiyaahudi mwisengerero. Abhiija bhayo bhaangi zimbwa, bharakora ubhasarya, bharakandikija kubha utinwi neho usabhurwi.

³ Rora itwi niitwi abhaatu bhi isaaru ya amaheene, ku kubha Egoro Indindu iratusakirya kosengera Mungu. Itwi turiizunjirya Yisu Kiriisitu na kumwisega. Na niitwi tatakwiseega amahocha gitu gu umubhiri kobhona ubhutuurya,

⁴ nangabha inyusi naari niratura kwisega amang'ana gu umubhiri. Ariibhi areho umutu wanu akwirora anago amahocha gu umubhiri

ganu gakwenderwa kwisegwa, inyi ninago maaru gu ukwisega kukira ewe.

⁵ Inyi nikasaarwa urusiku rwa kanaani kwima ukwibhurwa,* nirarwira kukigambu cha Bhenjamiini, wi icharu cha Izirairi. Inyi ni-Mwibhuraaniya wa amaheene. Kokogekora imigiru ji Ikiyaahudi, niinyi nagigwatiri bhwaheene, ku kubha naari Mufarisaayo.†

⁶ Na nikiigomba bhukung'u kokora ganu nakiniri nego Mungu asiigiri. Kiyo necho chankuriri kubhareetera Abhakiriisitu inyaaku. Moheene yinu ekobhoneka kumigiru, naari nitaana isoro ryaryusi.

⁷ Nawe, ganu guusi naari nekorora ganu ubhwera, nangwinu nirarora ni-ga kurimirya ku kumutuna Kiriisitu.

⁸ Na itari gayo ageene, nawe nirarora guusi ni-ga kurimirya karing'aa'ya nu ubhwera ubhukuru bhwo okomenya Yisu Kiriisitu, Umakuru waani. Igaru waazi, nitigiri agandi guusi. Nirabhara gayo nchu ubhubhuruuru, korereke nibhi amutu wa Kiriisitu,

⁹ na nigwatani nawe. Nitakwisega naatu eheene yinu ikurwa ku kutuna imigiru, nawe eheene yinu ikurwa ku kwisirirya Kiriisitu. Eheene yiyo, ikurwa kwa Mungu kubhwisirirya.

¹⁰ Nereenda nemenze Kiriisitu nu ubhunaja bhu ukuryaka kwazi, nu ubhugwatani bhw inyaaku yaazi chimbu ewe anyakiri, na nereenda nikwi chimbu ewe aakuuri.

* **3:5** Rora Ubhatangi 17:12; Abharaawi 12:3. † **3:5** **Mufarisaayo.** Kamaragirira bhukung'u, rora ring'ana Abhafarisaayo muKiniibhasa.

¹¹ Niragenda amang'ana gayo, korereke nituri kubha gati wa abhaatu bhanu Mungu akubharyara mubhaku.

Ukwigumirirya kuhika mutiniru ye emeremo

¹² Inyi nitakubhuga nihikiri mutiniru ya amang'ana gayo, hamwi nimariri kubha managu, ziyi, nawe nirakaja orogendo korereke nebhone gayo. Gayo nego Yisu Kiriisitu ambirikiriiri nebhone.

¹³ Abhahiiri bhaani, nitakwibhara nimariri kugwata gayo. Nawe nirakora ekegero kimwi, nitigiri kwiseega ganu gaahitiri, neng'ehe korereke nebhone ganu gare embere.

¹⁴ Nirakaja orogendo nihikiri ubhwindi bhwani korereke nebhone umubhanu gwani. Umubhanu guyo negwe ubhubhirikirwa bhwa Mungu kusikira mwisaaru kanzira ya Yisu Kiriisitu.

¹⁵ Itwasibhu bhanu tukung'iri mubhwisirirya, toreenderwa kwisiriran'ya kung'ana yinu. Ariibhi amiisigi ganu gatatuubhini na amang'ana ganu, Mungu newe araabheereche mugamenye chimbu gari.

¹⁶ Kinu kikwenderwa ni-kuja embere kanzira yiyoyiyo yinu tutuniri kuhika nangwinu.

Abhiisirirya bhigi eteemwa ya Paauru

¹⁷ Abhahiiri bhaani, bhusi mwigigi eteemwa yaani. Na mwigigi kubhaatu bhanu bhakutuna eteemwa yiitu.

¹⁸ Nimariri kubhabhaurira manga kaaru ring'ana rinu, nangu nirarigarukira kwiki nuru kwa ngusuri, abhaatu bhaaru bhariikara ncha abhabhisa bhu umusarabha gwa Kiriisitu.

¹⁹ Itinirũ yaabhu ni-kurichwa, inamba yaabhu neyo mungu waabhu. Ebho bhariikumirya amahocha ga zisuni ganũ bhakokora. Na bhariiseega amang'ana gi isi.

²⁰ Nawe, itwi ni-bhiikari bha mwisaaru na turi-sega kunamba kurũ Umusabhuri, Umukuru Yisu Kiriisitu, aazi kurwa iyo.

²¹ Ewe ana amanaga gu ukutũra ebhegero bhyusi bhibhi iyaasi wũ ubhukangati bhwazi. Kunzira ya amanaga gayo, arachura imibhiri jitu ju ubhunyuhirũ, gigungibhwi nchũ umubhiri gwazi.

4

¹ Kwibhu, abhahiiri bhaani, mwimiri bhwima kukwisega Umukuru. Nibhasigiri na niriigomba bhukung'u kubharora imwi, abhasaani bhaani. Imwi, ne-bhozomerwa bhwani na ni-mubhanũ gwani gunũ nihirwi komeremo ginũ nikuriri.

Amaangirijũ ga Paurũ

² Nirabhiisasaama bhukung'u Iudiya na Sintiki bhabhi nu ubhwindi bhũmwĩ, ku kubha bharatuna Umukuru Yisu.

³ Na naawi omohocha umukindichani omoheene, nirasabha ubhasakiryi abhakari bhabhiri bhayo bhabhi nu ubhwindi bhũmwĩ. Bhabhiri bhayo bhuusi bhakiikong'eererya bhukung'u hamwimwi na niinyi ku karagan'ya Ing'ana Inzumu iguru wa Yisu Kiriisitu. Naatu abhakari bhayo bhaari bharakora emeremo hamwimwi na Kiriminti na abhahocha abhakindichani abhandi. Amariina ga abhaatu

bhayo bhūsi gaandikirwi mukitabhu chu ubhūhu.

⁴ Mozomerwe siku zūsi, ku kugwatana na Umukuru Yisu, nirabhuga naatu, mozomerwe!

⁵ Ubhanyūhu bhwanyu bhomenyekani kubhaatu bhūsi. Umukuru Yisu ari haguhi kuuza.

⁶ Mutigi kwitiimaata kwa kegero chūsi, nawe kamang'ana gūsi, ku kumusabha na kwisasaama, hamwimwi na kukumya, ubhwindi bhwanyu bhomenyekani kwa Mungu.

⁷ Kugayo, omorembe gwa Mungu gūsi gūkukira amang'ini gūsi ga abhaatu, gurariibha zekoro na amang'ini gaanyu, ku kugwatana na Yisu Kiri-situ.

⁸ Akumara, abhahiiri bhaani, amang'ana gugūsi ga amaheene, gugūsi ganu gakwenderwa kusuukwa, gugūsi ge eheene, gugūsi ganu gatiisangiryi nu ubhūhi, gugūsi ganu gakozomera, gugūsi ganu ganu ubhukumuka ubhūzumu, bhuraabheho ubhūzumu bhwabhwasi, bhuraabheho ubhukumuka bhwabhwasi, mugiiisege amang'ana gayo.

⁹ Mong'ehe kokora garya mwigiri na kugasung'aana kurwa kwa niinyi, ganu mwigwiri nigambiri, na kugarora nikuriri. Neho, Mungu wūsi akubhaha omorembe, araang'ehe kubha hamwimwi na niimwi.

Paausi arakumya Abhafiripi

¹⁰ Mmbe, nizumirwi bhukang'u ku kugwatana na Umukuru Yisu, ku kubha mutinira mutangiri naatu kunyiiseegera. Nizi kubha siku zūsi mwari maranyiiseegera, nawe mukatamwa inzira yu ukutama ubhasakirya bhwanyu kwa niinyi.

11 Nitakugambabhu ku kubha ninu ubhwindi, ziye. Niigiri kotoosa kwa bhwikari bhwabhwasi.

12 Nangu niigiri kwikara ikihabhi, na niigiri kwikara ikiniibhi. Niigiri kotoosa na gusi ganu gakombona, ibhi ribhaga ryi inzara, hamwi ribhaga ryu umwigutu, ribhaga ryu ukubha na bh-yaru, hamwi ribhaga ryu ukusuuhirwa.

13 Niranaja kokora gusi gayo, ku kubha Kiriisitu newe akong'a amanaga.

14 Nawe, mukakora bhwaheene kugwatana na niinyi manyaaku yinu naari nayo.

15 Chimbu mwizi Abhafiripi imwi, hanu natan-giri kobheerekeererya Ing'ana Inzamu, na hanu naruuri mucharu chanyu cha Makiduniya, imwi imubheene mwari maransakirya. Risengerero ryanyu irylene neryo ryari hamwimwi na niinyi kamang'ana gu ukuhurucha na kusung'aana ebhegero.

16 Nuru hanu naari marubhiri rwa Tisaruniki, mukantumira iny ebhegero bhu ukansakirya, na itaari roendo ramwi.

17 Nitakugambabhu ku kubha nereenda kusung'aana ebhegero kurwa kwa niimwi, ziye. Nawe nisiigiri nerore urubhangu ranu Mungu ariibhahi kubhweryakoro bhwanyu.

18 Nangu, ebhegero bhusi binu mwantumiiri kwa ipafuruditu, nibhisung'aaniri. Bhisiri kamara ubhwindi bhwan bhwasi, na ni-bhyaru kukira binu niindiri. Ubhasakirya bhuyo bhubhiri nchi ikimweso* cho omoretayo umazumu, ikimweso kinu kiriisiriribhwa na kozomeerya Mungu.

* 4:18 *Ikimweso*. Kumaragirira bhukung'u, rora ikiniibhasa.

¹⁹ Mmbe, Mungu waani, arabhaha ubhwindi bhwanyu bhwasu kuring'aana nu ubhuniibhi bhu ubhugungu bhwazi, kanzira ya Yisu Kiriisitu.

²⁰ Bhaabha witu Mungu agungibhwi kemerano! Garami.

Amang'ana gi itinirũ

²¹ Mubhakeerye bhanu bhwasu bhakwisirirya Yisu Kiriisitu bha Firipi. Abhiisirirya bhanu bhakohokerya hamwimwi na niinyi, bhwasu bharabhakeerya.

²² Na abhiisirirya bhwasu bhanu bhakwikara murubhiri ranu bharabhakeerya, kindi abhasakirya bhanu bhakwikara munyumba ya Kaisaari.

²³ Ihigungi bhyu Umukuru witu Yisu Kiriisitu bhibhi hamwimwi na niimwi. Garami.

**Ubhuragi Ubhuhya Mukigambũ chi Ikikiizũ
Ikizu: Ubhuragi Ubhuhya Mukigambũ chi Ikikiizũ (New
Testament+) for Tanzania**

copyright © 2024 Wycliffe Bible Translators, Inc.

Language: (Ikizu)

Contributor: Wycliffe USA

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-03

PDF generated using Haiola and XeLaTeX on 3 May 2025 from source files dated 3 May 2025

cfe4772f-9f09-59a0-b72b-3863d6657553